

যাকাতের নেসাব ও হকদার

যাকাতের নেসাব

বর্তমান বাজার দর অনুযায়ী (উদাহরণ স্বরূপ: ভরি প্রতি প্রায় 1400 টাকা হিসাবে) রূপার নেসাব হয় 73500 টাকা। তাই কারো নিকট ঐ পরিমাণ টাকা থাকলে বা স্বর্ণ-রূপা কিংবা টাকা ও স্বর্ণ-রূপা এবং ব্যবসায়িক পণ্য মিলে নেসাব পরিমাণ থাকলে তার উপর যাকাত ফরয হবে। তদ্রূপ কারো নিকট শুধু স্বর্ণ থাকলে সাড়ে সাত তোলা স্বর্ণ বা শুধু সাড়ে বায়ান্ন তোলা রূপা থাকলে তার উপর যাকাত ফরয হবে। এর কম থাকলে যাকাত ফরয হবে না।

যাকাত ফরজ হওয়ার জন্য নেসাবের ওপর চন্দ্র মাস হিসেবে পূর্ণ এক বছর অতিবাহিত হওয়া শর্ত। বছর পূর্ণ হওয়ার দ্বারা উদ্দেশ্য হল বছরের উভয় প্রান্তে নেসাব পূর্ণাঙ্গ থাকা; বছরের মাঝখানে পূর্ণ থাকুক বা না থাকুক। সুতরাং বছরের মাঝখানে পূর্ণাঙ্গ নেসাব পরিমাণ সম্পদ থাকা শর্ত নয়। (মুসান্নাফে ইবনে আবী শাইবা, হাদীস ৯৯৬৬, ৯৯৪৮, আলমুহীতুল বুরহানী ৩/১৫৬; ফাতাওয়া হিন্দিয়া ১/১৭৬; ফাতাওয়া খানিয়া ১/২৪৯, ১/২৬৪; শরহ মুখতাসারিত তহাবী ২/৩০৫, ২/২৬৬, ২/৩৯০; আদুররুল মুখতার ২/২৯৩, ২/৩৪৮)

যাকাতের হকদার

আল্লাহ তা'আলা বলেন-

إِنَّمَا الصَّدَقَاتُ لِلْفُقَرَاءِ وَالْمَسْكِينِ وَالْعَامِلِينَ عَلَيْهَا وَالْمُؤَلَّفَةِ قُلُوبُهُمْ وَفِي الرِّقَابِ وَالْغَارِمِينَ وَفِي سَبِيلِ اللَّهِ وَابْنِ السَّبِيلِ فَرِيضَةً مِّنَ اللَّهِ وَاللَّهُ عَلِيمٌ حَكِيمٌ

যাকাত হল কেবল ফকির, মিসকীন, যাকাত আদায়কারী ও যাদের চিত্ত আকর্ষণ প্রয়োজন তাদের হক এবং তা দাস-মুক্তির জন্য, ঋণ গ্রস্তদের জন্য, আল্লাহর পথে জিহাদকারীদের জন্যে এবং মুসাফিরদের জন্যে, এই হল আল্লাহর নির্ধারিত বিধান। আল্লাহ সর্বজ্ঞ, প্রজ্ঞাময়। -সরা তাওবাহ, আয়াত-৬০

কুরআনুল কারীমে যাকাত প্রদানের আটটি প্রকার বর্ণনা করা হয়েছে। কিন্তু হযরত উমর রাযিআল্লাহু তা'আলা আনহু তাঁর খেলাফতকালে চিত্তাকর্ষণের জন্য যাদেরকে যাকাত প্রদান করা হতো, তাদেরকে যাকাত দিতে নিষেধ করেছেন। কারণ, তখন ইসলাম অনেক শক্তিশালী হয়ে গিয়েছিল। এ ব্যাপারে সাহাবায়ে কেরামের কেউ তাঁর সাথে মতানৈক্য করেনি। সুতরাং সাহাবায়ে কেরামের ইজমার ভিত্তিতে এই প্রকারটি যাকাতের হকদারের তালিকা থেকে বাদ হয়ে গিয়েছে। ফলে যাকাত আদায়ের জন্য সাতটি শ্রেণী অবশিষ্ট রয়েছে। সাত শ্রেণীর বিস্তারিত বিবরণ নিম্নে দেওয়া হল:-

১. দরিদ্র: অর্থাৎ এমন ব্যক্তি যে নেসাব পরিমাণ সম্পদের মালিক নয়। যে ব্যক্তি নেসাবের চেয়ে কম সম্পদের মালিক তাকে যাকাত দেওয়া জায়েজ হবে; যদিও সে সুস্থ ও উপার্জনশীল হয়।
২. নিঃস্ব: অর্থাৎ এমন ব্যক্তি যার অর্থ সম্পদ কোন কিছুই নেই।

৩. ইসলামী রাষ্ট্রের রাষ্ট্রীয় কোষাগারের জন্য শরীয়ত নির্দিষ্ট যাকাত আদায়কারী আমেল। এটা ইসলামী রাষ্ট্রপ্রধান দ্বারা নিযুক্ত হতে হবে। নিজে নিজে মনে করে নিলে হবে না। {জাওয়াহিরুল ফিকহ-৬/৬৯}

৪. ক্রীতদাসের মুক্তির জন্য। আর তা হলো চুক্তিবদ্ধ ক্রীতদাস। অর্থাৎ যে ক্রীতদাসের মুনীবের সঙ্গে নির্দিষ্ট অর্থ প্রদানের শর্তে আযাদ করে দেওয়ার চুক্তি সম্পন্ন হয়েছে। এই শ্রেণি বর্তমানে নেই। তবে যদি কখনো পাওয়া যায়, তাহলে তাদেরকে যাকাত দেওয়া যাবে।

৫. ঋণগ্রস্ত: অর্থাৎ এমন ব্যক্তি যার কাছে মানুষ এই পরিমাণ ঋণ পায়, যেই পরিমাণ ঋণ পরিশোধ করার পর সে পূর্ণ নেসাব পরিমাণ সম্পদের মালিক থাকে না।

৬. ফী সাবিলিল্লাহ: তথা আল্লাহর রাস্তায় থাকা ব্যক্তিদের জন্য। আল্লাহর দ্বীনকে সমুন্নত করার লক্ষ্যে যে কোন ধরনের প্রচেষ্টা ‘ফী সাবিলিল্লাহ’ বা আল্লাহর রাস্তার অন্তর্ভুক্ত। জিহাদ, দ্বীনী ইলম অর্জনের যাবতীয় পথ এবং দ্বীন প্রচারের যাবতীয় মাধ্যম এ খাতের অন্তর্ভুক্ত। ফুকাহায়ে কেরাম বলেন এতে রয়েছেন- জিহাদরত মুজাহিদরা। তাদের জিহাদের অস্ত্র ও পাথেয় ক্রয় করার জন্য যাকাতের টাকা গ্রহণ করবে। হজ্জের সফরে থাকা দারিদ্র ব্যক্তির জন্য। ইলমে দ্বীন অর্জনকারী দারিদ্র ব্যক্তির জন্য। {আদ দুররুল মুখতার-৩৪৩, হিদায়া-১/১৮৫, রুহুল মাআনী-৬/৩১৩}

৭. মুসাফির : সফরে গিয়ে যার পাথেয় শেষ হয়ে গেছে সে ব্যক্তিকে যাকাতের অর্থ প্রদান করে বাড়ী পর্যন্ত পৌঁছানোর ব্যবস্থা করতে যাকাতের অর্থ দান করা যাবে। এক্ষেত্রে উক্ত মুসাফির সম্পদশালী হলেও তাকে যাকাত প্রদান করা যাবে।

উপরোক্ত ক্যাটাগরিতে যাকাত আদায় করলেই কেবল যাকাত আদায় হবে। অন্য কাউকে যাকাত দিলে তা আদায় হবে না। ফুকাহায়ে কেরাম যাকাত আদায়ের জন্য একটি শর্তারোপ করেছেন এই যে, যাকাতের টাকার মালিক বানিয়ে দিতে হবে দানকৃত ব্যক্তিকে। যদি মালিক বানিয়ে দেয়া না হয়, তাহলে যাকাত আদায় হবে না।

যেমন কাউকে কোন বস্তু ভোগ দখলের অধিকার দিয়ে নিয়ত করল যাকাতের, তাহলে এর দ্বারা যাকাত আদায় হবে না। সেই হিসেবে কোন প্রতিষ্ঠান, মাদরাসা, মসজিদে যাকাতের টাকা দেয়া জায়েজ নয়, যদিও তাতে গরীব মানুষ থাকে, নামায পড়ে, পড়াশোনা করে। তবে প্রতিষ্ঠানের গরীবদের, মাদরাসা গরীব ছাত্রদের, মসজিদের গরীব মুসল্লিদের যাকাত দিলে তাতে মালিক বানিয়ে দেয়ার বিষয়টি থাকায় তা জায়েজ হবে। {ইনায়া আলা ফাতহিল কাদীর-২/২৬৭-২৬৮, আল হিদায়া-১/২০৫, তাবয়ীনুল হাকায়েক-১/২৯৯}

১. কাফেরকে

২. ধনী অর্থাৎ নেসাব পরিমাণ সম্পদের মালিককে; যদিও সে শিশু হয়

৩. হাশেমী ও তাদের ক্রীতদাসদেরকে

৪. যাকাত দাতার উর্ধ্বতন এবং অধঃস্তন কাউকে। যেমন:- পিতা, দাদা বা এর উর্ধ্বতন কাউকে। এমনিভাবে পুত্র, পৌত্র বা এর অধঃস্তন কাউকে।

৫. স্ত্রী, স্বামীকে এবং স্বামী, স্ত্রীকে।

* নিকটাত্মীয় গরীবদের মাঝে অতঃপর অন্যান্য প্রতিবেশীদের মাঝে যাকাত প্রদান করা উত্তম। উপরে উল্লেখিত আত্মীয় ছাড়া অন্যান্য যেকোনো সম্পর্কের নিকটাত্মীয়রা যাকাত পাওয়ার বেশী হকদার। তাদের যাকাত দিলে দ্বিগুণ সওয়াব হবে। একটি যাকাত আদায়ের সওয়াব, অপরটি আত্মীয়তার সম্পর্ক রক্ষা করার সওয়াব। যেমন ভাই-বোন, চাচা ফুফু মামা ভাতিজা ভাগিনা এরা যদি অভাবগ্রস্ত হয় তাহলে তাদেরকে যাকাত দেওয়া বেশি উত্তম।

কোন অভাবগ্রস্ত আলেম, মসজিদের ইমাম, মোয়াজ্জেন, খাদেম বা মাদ্রাসার ছাত্রকে যাকাত দিলেও দ্বিগুণ সওয়াব হবে। তবে তাদেরকে বেতন বাবদ যাকাতের টাকা দিলে যাকাত আদায় হবে না।

যাকাত দেওয়ার ক্ষেত্রে নগদ টাকা বা কোন বস্তুর পরিপূর্ণ মালিক বানিয়ে দেওয়া শর্ত। মালিক না বানিয়ে কোন বস্তু দিয়ে শুধু উপকৃত হওয়ার সুযোগ দিলে যাকাত আদায় হবে না।

* যাকাত আদায়ের ক্ষেত্রে যাকাত গ্রহীতাকে মালিক বানানো অপরিহার্য। সুতরাং মসজিদ মাদ্রাসা নির্মাণ, রাস্তা সংস্কার বা পুল তৈরির জন্য যাকাতের অর্থ ব্যয় করা জায়েয হবে না। অনুরূপভাবে মৃত ব্যক্তিকে কাফন দেওয়া কিংবা তার ঋণ পরিশোধ করার জন্য যাকাতের অর্থ ব্যয় করা জায়েয হবে না। কেননা, এসব ক্ষেত্রে মালিক বানানোর বিষয়টি অনুপস্থিত।

- * এক ব্যক্তিকে পূর্ণ নেসাব পরিমাণ যাকাত দেওয়া মাকরুহ।
- * কোন ঋণগ্রস্ত ব্যক্তিকে তার ঋণ পরিশোধের জন্য নেসাব পরিমাণের চেয়ে বেশি যাকাত দেওয়া মাকরুহ হবে না।
- * বিনা প্রয়োজনে এক শহর থেকে অন্য শহরে যাকাতের অর্থ প্রেরণ করা মাকরুহ। তবে আত্মীয়-স্বজনের নিকট পাঠানো মাকরুহ হবে না।

তদ্রূপ এমন সম্প্রদায়ের নিকট পাঠানো মাকরুহ হবে না, যারা যাকাত দাতার এলাকাবাসীর চেয়ে অধিক অভাবগ্রস্থ।
অনুরূপভাবে এমন ক্ষেত্রে যাকাত পাঠানো মাকরুহ হবে না, যা মুসলমানদের জন্য অধিক উপকারী। যেমন:- দ্বীনি মাদরাসা ও এতিমখানার গরীব শিক্ষার্থীদের জন্য ইত্যাদি।